

# 六祖壇經真福寺本

法海集記，志道編集，惠昕分門

林崇安教授編校

佛法教材系列 W5

財團法人內觀教育基金會

## 〈六祖壇經真福寺本〉序

唐朝惠昕(787)編的《韶州曹溪山六祖壇經》簡稱《六祖壇經》，其特色是分上下卷並編出十一門，下傳後保留在日本有〈真福寺本〉(1012)·〈興聖寺本〉(1031)·〈大乘寺本〉(1116)·〈天寧寺本〉(1116)等，此中的〈真福寺本〉保留有六祖自述的《法寶記》一詞，為現存接近最早期的壇經本之一，有其代表性，此本的傳承為：

〈法海後期本〉(714 頃) → 〈志道抄本〉(720 頃) → 彼岸 → 悟真 → 圓會 → 〈惠昕本〉(787) → 〈惠昕周希古刻本〉(1012) → 〈真福寺本〉。

本書編校的是〈真福寺本〉。編校時，除保留舊有的十一門，如〈一、眾請說法門〉等之外，為了比對版本的內容，附帶標上〈德異本〉新的「基準十一品」的名稱：【眾請說法品 1，悟法傳衣品 2，摩訶般若品 3，功德淨土品 4，定慧一體品 5，教授坐禪品 6，傳戒歸依品 7，參請機緣品 8，唐朝徵詔品 9，法門對示品 10，付囑流通品 11】，並於前七品每段落標上「德異本編號」：【A1】到【L3】，如此可以比照出不同版本之間的段落移動情形。

如果只是閱讀，則可不管「基準十一品」和「德異本編號」，因為全書是順著經文下排。本書校正時，參考了各種壇經版本。文中刮號{}：表示於此內補充漏字或改正。書末附有〈真福寺本〉的序和跋，說明惠昕分卷、分門的緣起。

願此工作，有助於學佛者在義理和實踐上的增進。

林崇安 2021.03

於內觀教育禪林

# 六祖壇經真福寺本

## 目錄

### 舊十一門【新十一品】

- 一、眾請說法門【眾請說法品 1】 .....p. 4
- 二、悟法傳衣門【悟法傳衣品 2】 .....p. 4
- 三、為時眾說定慧門【定慧一體品 5】 .....p. 9
- 四、教授坐禪門【教授坐禪品 6】 .....p. 11
- 五、說傳香懺悔發願門【傳戒歸依品 7】 .....p. 12
- 六、說一體三身佛相門【屬傳戒歸依品 7】 .....p. 14
- 七、說摩訶般若波羅蜜門【摩訶般若品 3】 .....p. 15
- 八、示西方相狀門【功德淨土品 4】 .....p. 19
- 九、諸宗難問門【參請機緣品 8】 .....p. 22
- 十、南北二宗見性門【屬參請機緣品 8】 .....p. 22  
【唐朝徵詔品 9 (無)】
- 十一 {甲}、教示十僧傳法門【法門對示品 10】 ...p. 26
- 十一 {乙}、滅度年月附【付囑流通品 11】 .....p. 28
- 〈真福寺本〉的序跋 .....p. 32

# 六祖壇經真福寺本

## 【經名】 韶州曹溪山六祖壇經

### 一、眾請說法門【眾請說法品 1】

【A1】（德異本編號）

大師初從南海上至曹溪。

韶州刺史韋璩等，請於大梵寺講堂中為眾開緣，授無相戒，說「摩訶般若波羅蜜法」。

大師是日，說頓教 { 法 }，直了見性無疑；普告僧俗，令言下各悟本心，現成佛道。

座下僧尼、道俗一千餘人，刺史、官僚等三十餘人，儒宗學士三十餘人，同請大師說是法門。

【A2】

刺史韋璩令門人法海抄錄流行，傳示後代。

若承彼宗旨，學道者遞相 { 傳授 }，有所依憑耳。

### 二、悟法傳衣門【悟法傳衣品 2】

【B1】（德異本編號）

爾時，大師既昇座已，而示眾言：「善知識！總淨心念摩訶般若波羅蜜。」

【B2】

大師良久不語，自淨其心，忽然告言：「善知識！菩提自性本來清淨，但用此心，直了成佛。」

【B3】

大師言：善知識！且聽某甲行由，得法事意。

某甲嚴父，本貫范陽，{ 左降流于嶺南，作新州 } 百姓。

此身不幸，父少早亡。老母孤遺，移來南海。

艱 { 辛 } 貧乏，於市賣柴。時有一客買柴，便令送至官店，客收柴去。

某甲得錢，卻出門外，見一客讀《金剛經》。

某甲一聞，心便開悟，遂問客言：「從何所來，持此經典？」

客云：「我從蘄州黃梅縣東 {馮茂山} 來，其山是第五祖弘忍大師在彼 {主化}，門人一千有餘。我到彼山禮拜，聽受此經，大師常勸僧俗，但持《金剛經》，即自見性，直了成佛。」

某甲聞說，宿昔有緣，乃蒙一客取銀十兩與某甲，令充老母衣糧，教某甲便往黃梅禮拜五祖。

某甲安置母畢，即便辭親，不經三十餘日，便至黃梅，禮拜五祖。

#### 【B4】

問曰：「汝何方人，來到此山中禮拜？今向吾邊，欲求何物？」

某甲對云：「弟子是嶺南人，新州百姓，遠來禮師，唯求作佛，不求餘物。」

五祖責曰：「汝是嶺南人，又是獗獠，若為堪作佛？」

某甲言：「人雖有南北，佛性本無南北；獗獠身與和尚不同，佛性有何差別？」

大師更欲共某甲久語，且見徒眾總在身邊，乃令某甲隨眾作務。

某甲啟和尚言：「弟子自心常生智慧，不離自性即是 {福田}，未審和尚教作何務？」

五祖言：「這獗獠根性大利。汝更勿言，且去後院。」

有一行者，差某甲破柴踏碓八箇餘月。

五祖一日忽見某甲言：「吾思汝之明見，恐有惡人害汝，遂不與言，汝知之不？」

某甲言：「弟子亦知師意，不敢行至堂前，令眾人不覺。」

#### 【B5】

五祖一日喚諸門人總來：

「吾向汝說，世人生死事大，汝等終日供養，只求福田，不求出離生死苦海。汝自性迷，福何可救？」

汝等各去後院，自看智慧，取自本心般若之性，各作一偈，來呈吾看。若悟大意，付汝衣法，為第六代祖。火急 {便作}，不得遲滯！思量即不中用。見性之人，言下須見，{若輪刀上陣一般}。」

眾得處分，來至後院，遞相謂言：「我等眾人，不須呈心，用意作偈，將呈和尚，有何所益？神秀上座見為教授師，必是 {他} 得。我輩謾作偈誦，枉用心力。」

諸人聞語，各自息心，咸言：「我等迤後依止神秀即得，何煩作偈！」

#### 【B6】

神秀思惟：「諸人不呈偈者，為我與他為教授師。我須作偈將呈和尚，

若不呈偈，和尚如何知我心中見解深淺？我呈偈意即善，求佛覓祖即惡，却同凡心奪其聖位無別。若不呈偈，終不得法。大難！大難！」

### 【B7】

五祖堂前，有步廊三間，擬請供奉盧珍畫楞伽變相，及五祖血脈圖，流傳供養。

### 【B8】

神秀作偈成已，數度欲呈，行至堂前，心中恍惚，遍體汗流，擬呈不得。前後經過四日，一十三度呈偈不得。

秀乃思惟：「不如向廊下書著彼偈，和尚看見，忽若道好，即出頂禮，云是秀作；若道不堪，枉向山中數年受人禮拜，更修何道！」

言訖，夜至三更，不使人知，自執燈燭，於南廊中間壁上，書《無相偈》，呈心所見，神秀偈曰：

身是菩提樹，心如明鏡臺，時時勤拂拭，莫使染塵埃。

秀書偈了，便卻歸房，人總不知。

神秀思惟：「五祖明日見偈{歡喜}，出見和尚，即言秀作；若言不堪，自是我迷，宿業障重，{不合}得法，聖意難測。」

房中思想，坐臥不安，直至五更。

### 【B9】

五祖即知神秀入門未得，不見自性，喫粥了，便即天明。五祖方便喚盧供奉來，擬向南廊{畫}五代血脈供養。

五祖忽見其偈，報言：「供奉却不畫也，輒奉十千，勞供奉遠來。《金剛經》云：凡所有相，皆是{虛}妄。不如留此偈，令迷人誦。依此偈修，免墮三惡，依此修行，{有}大利益。」

五祖喚門人燒香偈前，令凡人見，生敬重心。

「汝等盡須誦取。悟此偈者，即得見性，依此修行，必不墮落。」

門人盡誦，皆歎善哉！

五祖三更，喚秀入堂，問：「是汝作此偈不？若是汝作，應得吾法。」

秀言：「罪過！實是秀作。亦不求祖位，望和尚慈悲，看弟子心中有少智慧不？」

五祖言：「汝作此偈，未見本性，只到門上，未離凡愚。依此修行，即不墮落。」

如此見解，覓無上菩提即不可得。無上菩提須得言下識自本心，見自

本性，不生不滅。

於一切時中，念念自見，萬法無滯，一真一切真，萬境自如，如如之心，即是真實。若如是見者，即是無上菩提之自性也。」

五祖言：「汝且去一二日思惟，更作一偈，將來呈吾看，汝偈若得入門，見自本性，付汝衣法。吾不惜法，汝見自遲。」

秀乃作禮便出。又經數日，作偈不成，心中恍惚，神思不安，猶如夢中，行坐不樂。

### 【B10】

復經兩日，有一童子於碓坊過，唱誦其偈。

某甲一聞，便知此偈未見本性。某甲 { 未蒙教授 }，早識 { 大意 }，遂問童子曰：「誦者是何偈？」

童子曰：「爾這獗獠！不知大師言：世人生死事大，欲得傳付衣法。令門人作偈來 { 呈 } 看。若悟大意，即付衣鉢，為第六祖。神秀上座於南廊壁上，書《無相偈》。五祖令門人盡誦此偈，若得悟者，即見自性成佛；依此修行，即不墮落。」

某甲言：「上人！我在此踏碓八箇餘月，未曾行到堂。望上人引至偈前禮拜，亦要誦取，結來生緣，同生佛地。」

### 【B11】

童子便引某甲至南廊偈前禮拜。

某甲為不識字，請一上人為讀。某甲得聞，願生佛會。

時，有江州別駕姓張名日用，便高聲讀。

某甲一聞，即識大意，即言：「某甲亦有一偈，望別駕書安壁上。」

別駕言：「獗獠！汝亦作偈，其事希有。」

某甲啟別駕言：「若學無上菩提，不得輕於初學。俗諺云：下下人有上上智，上上人有勿意智。{ 若輕人 }，即有無量無邊 { 罪 }。」

張日用言：「汝但誦偈，吾為汝書，安西壁上。汝若得法，先須度吾，勿忘此言。」

某甲偈曰：

菩提本無樹，明鏡亦非臺，本來無一物，何處有塵埃？

說此偈已，僧俗總驚。

山中徒眾無不嗟訝，各相謂言：「奇哉！不得以貌取人，何得多時使他肉身菩薩！」

**【B12】**

五祖見眾人盡怪，恐人損他，向後無人傳法，遂便混破，向眾人言：「此偈亦未見性，云何讚歎？」

眾便息心，皆言未了，各自散歸，更不讚歎。

**【B13】**

五祖其夜三更，喚某甲至堂內，以袈裟遮圍，不令人見，為某甲說《金剛經》，恰至「應無所住，而生其心」，言下便悟，一切萬法，不離自性。某甲啟言：和尚！

何期自性本自清淨，何期自性本不生滅，

何期自性本自具足，何期自性無動無搖，能生萬法？

五祖知悟本性，乃報某甲言：「不識本心，學法無益。若言下識自本心，見自本性，即名丈夫、天人師、{佛}。」

**【B14】**

三更受法，人盡不知。便傳頓教及衣鉢云：汝為第六代祖，善自護念，廣度迷人。將衣為信稟，代代相承；法即心傳心，皆令自悟自解。自古佛佛惟傳本體，師師默付本心，令汝自見自悟。

五祖言：「自古傳法，命似懸絲。若住此間，有人害汝，汝須速去！」

某甲言：「某甲是南中人，久不知此山路，如何出得江口？」

五祖言：「汝不須憂，吾自送汝。」

某甲領得衣鉢，三更便發歸南。

五祖相送，直至九江驛邊。

有一隻船子，五祖令某甲上船，五祖把櫓自搖。

某甲言：「請和尚坐，弟子合搖櫓。」

五祖言：「只合吾渡汝，不可汝却度吾，無有是處。」

某甲言：「弟子迷時，和尚須度。今既已悟，過江搖櫓，合是弟子度。度名雖一，用處不同。某甲生在邊方，語又不正，蒙師教旨付{法}，今已得悟，即合自性自度。」

五祖言：「如是如是，但依此見，迤後佛法大行矣。汝去後一年，吾即前逝。」

五祖言：「汝今好去努力向南，五年佛法難起。他後行化，善誘迷人，若得心開，與吾無別。」

**【B15】**

辭違已了，便發向南。

兩月中間，至大庾嶺，不知逐後數十人來，欲趁某甲，奪衣取法，來

至半路，盡總却避。

唯一僧，姓陳，名惠明，先是四品將軍，性行麤惡，直至大庾嶺頭，趁及某甲。便還衣鉢，又不肯取，言：「我欲求法，不要其衣。」

某甲即於嶺頭，便傳正法。

惠明聞說，言下心開。某甲却令向北接人。

某甲後至曹溪，又被惡人尋逐，乃於四會縣避難。

經五年，常在獵中。雖在獵中，每與獵人說法。

#### 【B16】

某甲東山得法，辛苦受盡，命似懸絲。今日大眾同會，得聞{此法}，乃是過去千生，曾供養諸佛，方始得聞無上自性頓教。某甲與使君及官僚道俗，有累劫之因。教是{先聖所傳}，不是某甲自智。

#### 【B17】

願聞先聖教旨，各須淨心，聞了各自除疑，如先代聖人無別。

#### 【C1】

大師言：善知識！菩提般若之智，世人本自有之。只緣心迷，不能自悟，須求大善知識示道。愚人、智人，佛性本無差別，只緣迷悟不同，所以有愚、有智也。

### 三、為時眾說定慧門【定慧一體品 5】

#### 【G1】（德異本編號）

師言：善知識！我此法門，以定慧為本。大眾勿迷，言定慧別。定慧一體，不是二。定是慧體，慧是定用。即慧之時定在慧，即定之時慧在定。若識此義，即是定慧等學。諸學道人，莫言：「先定發慧，先慧發定，定慧各別。」作此見者，法即有二相：口說善、心中不善，定慧不等。心口俱善，內外一種，定慧即等。自悟修行，不在於諍。若諍先後，即同迷人。不斷勝負，卻增法我，不離四相。

#### 【G2】

善知識！一行三昧者，於一切處，行、住、坐、臥，常行一直心是也。《淨名經》云：「直心是道場，直心是淨土。」莫心行諂曲，口但說直、口說一行三昧，不行直{心}。但行直心，於一切法，無有執著。

#### 【G3】

迷人著法相，執一行三昧，直言：「坐{不動，除妄}不起心，即是一行三昧。」{若如是，此法}同無情，却是障道因緣。

善知識！道須通流，何以卻滯？心不住法，道即通流。心若住法名為自縛。

若言坐不動是，只如舍利弗宴坐林中，不合被維摩詰呵。

善知識！又見有人教坐，看心看淨，不動不起，從此置功。迷人不會，便執成顛，即有數百人，如是相教，故知大錯。

【G4】

善知識！定、慧猶如何等？猶如燈、光。有燈即光，無燈不光，燈是光之體，光是燈之用，名雖有二，體本同一。此定、慧法，亦復如是。

善知識！本來正教無有頓漸，人性自有利鈍。迷人漸契，悟人頓修。自識本心，自見本性，即無差別。所以立頓漸之假名。

【G5】

善知識！我此法門，從上已來，先立無念為宗，無相為體，無住為本。

【G6】

何名無相？於相而離相。

【G7】

無念者，於念而不念。

【G8】

無住者，人之本性，於世間善惡好醜，乃至冤之與親，言語觸刺欺誣之時，並將為空，不思酬害。

念念之中，不思前境。{前念}、今念、後念，念念相續不斷，{於一切法上無住。一念若住，念念即住}，名為繫縛。

於諸法上，念念不住，即無縛也。是以無住為本。

【G9】

善知識！外離一切相，名為無相。能離即法體清淨，是以無相為體。

【G10】

善知識！於諸境上，心若離染，萬境常寂，念上常離諸境，不於境上生心。

莫百物 { 不思 }，念盡除却即 { 死 }，別處受生。

學道者！莫不識法意，自錯猶可，更勸他人，自迷不見，又謗佛經。所以立無念為宗。

善知識！云何立無念為宗？只緣口說，不見 { 本 } 性，迷人於境上有念，念上便起邪見，一切塵勞妄想，從此而生。自性本無一法可得，若有所得，妄說禍福，即是塵勞邪見。{ 故 } 此法門立無念為宗。

善知識！無者，無何事？念者，念何物？

無者，無二相，無諸塵勞之心。念者，念真如本性。真如即是念之體，念是真如之用。真如自性起念，非眼、耳、鼻、舌能。真如有性，所以起念。真如若無，眼、耳、色、聲當時即壞。

善知識！真如自性起念，六根雖見聞覺知，不染萬境，真性而常自在。外能分別諸色相，內於第一義而不動。

#### 【G15】

善知識！此門坐禪，亦不看心，亦不看淨，亦不言不動。

若言看心，心元是妄，知心如幻，故無所看也。

若言看淨，人性本淨，由妄念故，蓋覆真如，但無妄想，性自清淨。起心看淨，却生淨妄，妄無處所，看者是妄。淨無形相，却立淨相，言是工夫，作此見者，障自本性，卻被淨縛。

善知識！若修不動者，但見一切人時，不見人之是非、善惡、過患，即是自性不動。

善知識！迷人身雖不動，開口便說他人是非、長短、好惡，與道違背也。若看心看淨者，却障道也。

### 四、教授坐禪門【教授坐禪品 6】

#### 【G11】（德異本編號）

師言：善知識！何名坐禪？

此法門中，無障無礙，外於一切善惡境界，心念不起，名為坐；內見自性不亂，名為禪。

#### 【G12】

善知識！何名禪定？

外離相為禪，內不亂為定。

外若著相，內心即亂。外若離相，心即不亂。

本性自淨自定，只為見境、思境即亂。

若見諸境心不亂者，是真定也。

善知識！外離相即禪，內不亂即定也。外禪內定，是為真定。

#### 【G13】

《淨名經》云：「{即時}豁然，還得本心」，《菩薩{戒}經》云：「{本源}自性清淨。」

#### 【G14】

善知識！於念念中，自見本性清淨，自修自行，{自}成佛道。

## 五、說傳香懺悔發願門【傳戒歸依品 7】

【H1】（德異本編號）

師言：善知識！某甲一會在此，皆共有緣，今各胡跪。

傳自性五分法身香：

一謂戒香，即自心中，無非、無惡、無嫉、無妬、無貪瞋、無劫害，名曰戒香。

二定香，即睹諸善惡境相，自心不亂即是也。

三慧香者，自心無癡，常以智慧觀照自性，不造諸惡。雖修眾善，心不執著。畏上愛下，{矜}孤恤貧，此名慧香。

四解脫香，即自心無所攀緣，不思善，不思惡，自在無礙，名解脫香。

五解脫知見香者，自心既無攀緣善惡，不可沉空守寂，即須廣學多聞，識自本心，達諸佛理，言滿天下無口過，行滿天下無怨惡，和光接物，無我無人，直至菩提，真性不易，名解脫知見香。

善知識！此香各自內薰，莫於外覓。

【H2】

今與善知識無相懺悔，滅除心中河沙積劫之罪。

善知識！前念後念及今念，念念不被愚迷染，從前惡念一時除，自性自除真懺悔。前念後念及今念，念念不被{誑}妄染，除却從前憍慢心，永斷名為自性懺。前念後念及今念，念念不被疽妬染，除却從前疽妬心，永斷名為自性懺。已上三遍唱。

{【H3】}

{善知識！已上是為無相懺悔。云何名懺？云何名悔？

懺者，懺其前愆，從前所有惡業、愚迷、憍誑、疽妒等罪，悉皆盡懺，願不復起，是名為懺。

悔者，悔其後過，從今以後所有惡業、愚迷、憍誑、疽妒等罪，今已覺悟，悉皆永斷，不復更作，是名為悔。故稱懺悔。凡夫愚迷，只知懺其前愆，不知悔其後過。以不悔故，前愆不滅，後過又生。前愆既不滅，後過復又生，何名懺悔！}

【I1】

師言：今既懺悔已，一時逐某甲道，與善知識發四弘誓願。

{各須}用心正聽：

自心邪迷眾生誓願度，自心煩惱無邊誓願斷，自性法門無盡誓願學，無上自性佛道誓願成！已上三遍唱。

【I2】

師言：善知識！大家豈不道眾生無邊誓願度，恁麼道？{莫道是}某甲度。

善知識！心中眾生，所謂邪迷心、誑妄心、不善心、疽妬心、惡毒心，如是心者，盡是眾生。各須自性自度，是名真度。何名自性自度？{即}自心中邪見、煩惱、愚痴眾生，將正見度。既有正見，使般若智，打破愚痴、迷妄眾生，各各自度。邪來正度，迷來悟度，愚來智度，惡來善度，如是{度者}，名為真度。

【I3】

又煩惱無邊誓願斷，自性除卻虛妄思想心是也。

【I4】

又法門無邊誓願學，須自見性，常行其善法，是名真學。

【I5】

又佛道無邊誓願成，即常須下心，行於普敬，離迷離覺，當生般若，除真除妄，即見佛性，即言下佛道成。常念修行，是願力法。

【J1】

師言：善知識！今發四弘願了，更與善知識授無相三歸依：善知識！歸依覺，二足尊。歸依正，離欲尊。歸依淨，眾中尊。從今日去，稱覺為師，更莫歸{依}邪迷外道。以自性三寶，常自證明！

【J2】

某甲{勸}善知識歸依自性三寶：佛者覺也。法者，正也。僧者，淨也。

【J3】

自心歸依覺，邪迷不生，少欲知足，能離財色，名二足尊。

【J4】

自心歸依正，念念無邪見，以無邪見故，即無人我、貢高、貪愛、執著，名離欲尊。

【J5】

自心歸依淨，一切塵勞、妄念雖在自性，皆不染著，名眾中尊。

【J6】

若修此行，是自歸依。凡夫不會，從日至日，受三歸戒。若言歸佛，佛在何處？若不見佛，憑何所歸？言却成妄。

善知識！各自觀察，莫錯用心。經文{分}明言自歸依佛，不言歸依他佛。自性不歸，無所歸處。

今既自悟，各須歸依自心三寶，內調心性，外敬他人，是自歸也。

## 六、說一體三身佛相門【屬傳戒歸依品 7】

### 【K1】（德異本編號）

師言：善知識！各各志心，某甲與說一體三身自性佛。令善知識見三身了然，自悟自性，總隨某甲道：

於自色身，歸依清淨法身佛。

於自色身，歸依千百億化身佛。

於自色身，歸依圓滿報身佛。

已上三遍唱。

### 【K2】

善知識！色身{是}舍宅，不可言歸，向者三身在自性中，世人總有，為自心迷，不見內性，外覓三身如來，不見自身中有三世佛。

善知識聽說！令善知識於自身中，見自性有三世佛。此三身佛從自性生，不從外得。

### 【K3】

何名清淨法身？世人性本清淨，萬法從自性生：思量一切惡事，即生惡行；思量一切善事，即生善行，如是諸法，在自性中。如天常清，日月常明，為浮雲蓋覆，上明下暗，忽遇風吹，眾雲散盡，上下俱明，萬象皆現。世人性常浮游，如彼雲天，亦復如是。

善知識！智如日，慧如月，智慧常明。於外著境，被妄念浮雲蓋覆，自性不得明朗。若遇知識聞真正法，自除迷妄，內外明徹，於自性中萬法皆現。見性之人，亦復如是。此名清淨法身佛。

善知識！自心歸依自性，是歸依真佛。

自歸依者，除却自性不善心、疽妬心、僞誑心、吾我心、誑妄心、輕人心、慢他心、邪見心、貢高心及一切{時}中不善行，常自見己過，不說他人好惡，是自歸依。

常須下心，行於普敬，即是見性通達，更無滯礙，是自歸依。

### 【K4】

何名千百億化身？若不思，萬法性本如空。一念思量，名為變化：思量惡事化為地獄，思量善事化為天堂，毒害化為龍蛇，慈悲化為菩薩，智慧化為上界，愚癡化為下方。自性變化甚多，迷人不能省覺，念念起惡，常行惡道。迴一念善，智慧即生，此是自性化身佛。

### 【K5】

何名圓滿報身？譬如一燈能除千年闇，一智能滅萬年愚。莫思向前已

過，常思於後，念念{圓}明，自見本性。善惡雖殊，本性無二。無二之性，名為實性。於實性中，不染善惡，此名圓滿報身佛。

師言：自性起一念惡，報滅萬劫善因。自性起一念善，報得河沙惡盡，直至無上 {菩提}，念念自見，不失本念，名為報身。

### 【K6】

善知識！從法身思量即是化身佛；念念自性自見即是報身佛。自悟自修自性功德，是真自歸依。皮肉是色身，色身是舍宅，不言歸也。但悟自性三身，即識自性大意。

### 六祖壇經卷上

## 七、說摩訶般若波羅蜜門【摩訶般若品 3】

### 【C2】（德異本編號）

師言：善知識！既識三身佛了，更為善知識說「摩訶般若波羅蜜法」。各各志心諦聽！ {某甲與說}。

世人終日，口念本體，不識自性，猶如誦食。口但說空，萬劫不得見性。

善知識！摩訶般若波羅蜜是梵語，此言大智慧到彼岸。此須心行，不在口說。口念心不行，如幻如電。口念心行，即心口相應。本性是佛，離性無別佛。

### 【C3】

何名摩訶？摩訶是大。心量猶如虛空，無有邊畔，亦無方圓大小，非青黃赤白，亦無上下長短，無瞋無喜，無是無非，無善無惡，無有頭尾。諸佛刹土，盡同虛空。世人妙性本空，無一法可得。喻此大空，自性真空，亦復如是。

善知識！今聞某甲說空，便即著空。第一莫空，若空心淨坐，即落無記空，終不成佛法。

善知識！世界虛空，能含萬物色象，日月星宿，山河泉源溪澗，一切樹木，惡人善人，惡法善法，天堂地獄，一切大海，須彌諸山，總在空中。世人性空，亦復如是。

師言：善知識！自性能含萬法是大。萬法在善知識性中。若見一切人，惡之與善，盡皆不捨，亦不染著，心如虛空，名之為大。

善知識！迷人口說，智者心行。又有迷人，空心淨坐，百無所思，自稱為大。此一輩人，不可共說，為邪見故。

善知識！心量廣大，廓周法界，用即了了分明，應用遍知一切。一切是一，一即一切，去來{自由}，心體無滯，此是{般若}。

善知識！一切般若智心，皆從自性而生，不從外人，莫錯用意，名真自用，一真一切真。

心量大事，不行小道。口莫終日說空，心中不修行此行。恰似凡人自稱國王，終不可得，非吾弟子。

#### 【C4】

善知識！何名般若？般若是智慧。一切處所、一切時中，念念不愚，常行智慧，即是般若行。一念愚即般若絕，一念智即般若生。世人愚迷，不見般若。口說般若，心中常愚。自言我修般若，念念說空，不識真空。般若無形相，智慧心即是。若作如是解，即名般若智。

#### 【C5】

何名波羅蜜？此是西國語，漢言到彼岸。

解義離生滅，著境生滅起。如水有波浪，即是於此岸。

{離}境無生滅，如水常通流，即名為彼岸，故號波羅蜜。

#### 【C6】

善知識！迷人口念。當{念}之時，有妄有非。念念若行，是名真性。悟此法者，是般若法。修{此}行者，是般若行。不修即凡，一念修行，法身等佛。

善知識！煩惱即是菩提。前念迷即凡，後念悟即佛。

前念著境即煩惱，後念離境即菩提。

#### 【C7】

善知識！摩訶{般}若波羅蜜，最尊、最上、最第一，無住、無往來，三世諸佛皆從中出，用大智慧，打破五蘊煩惱塵勞。

若人修行，定成佛道，變三毒為戒定慧。

#### 【C8】

善知識！我此法門從般若生八萬四千智慧。何以故？為世人有八萬四千塵勞；若無塵勞，智慧常在，不離自性。

悟此法者，即是無念、無{憶}、無著、無妄，莫起誑妄，用自真如性，以智慧觀照，於一切法不取、不捨，即是見{性成}佛道。

#### 【C9】

善知識！若欲入甚深法界，入般若三昧者，須修般若行，持誦《金剛般若經》，即得見性。當知此功德無量無邊，經中分明讚歎，不能具說。此法門是最上乘，為大智人說，為上根人說。小根小智人聞，心

生不信。何以故？

譬如大龍，下雨於閻浮提，漂流棗葉；若雨大海，不增不減。

【C10】

若大乘人、若最上乘人，聞說《金剛經》，心開悟解，故知本性自有般若之智，自用智慧常觀照，故不假文字。

譬如雨水，不從天有，元是龍王於江海中，將身攪上，令一切眾生、一切草木、有情無情，悉皆蒙潤，諸水眾流，卻入大海，合為一體。眾生本性般若之智，亦復如是。

【C11】

善知識！小根之人，聞此頓教，猶如草木根性自小，若被大雨，皆悉自倒，不能增長。

小根之人，亦復如是，{元}有般若之智，與大智之人更無差別，因何聞法，亦有悟不悟？緣邪見障重，煩惱根深。

猶如大雲覆蓋於日，不得風吹，日光不現。

般若之智，亦無大小，為一切眾生自心迷悟不同。

迷心外見，修行覓佛，未悟自性，即是小根。

若聞頓教，不執外修，但於自心常起正見，邪見煩惱塵勞常不能{染}，即是見性。

善知識！內外不住，去來自由，能除執心，通達無礙，能修此行，與《般若經》本無差別。

【C12】

善知識！一切經書及諸文字、大小二乘、十二部經，皆因人置，因智慧性，方能建立。若無世人，一切萬法，本自不有，故知萬法本因人興，一切經書因人說有。

緣其人中，有愚有智，愚為小{人}，智為大人。愚者問於智人，智者為愚人說法，令其悟解心開。愚人若悟{解}心開，即與智人無別。

善知識！不悟即佛是眾生；一念悟時，眾生是佛。

故知萬法盡在自心，何不從自心中，頓見真如本性。

【C13】

《菩薩戒經》云：「{本源}自性清淨。」識心見性，皆成佛道。

{《淨名經》云：}「即時豁然，還得本心。」

【C14】

善知識！我於忍和尚處一聞，言下便悟，頓見真如本性。是以將此教法流行，令學道者頓悟菩提，各自觀心，自見本性。

### 【C15】

若自不悟，須覓大善知識，解最上乘法者，直示正路。是善知識有大因緣，所謂化導，令得見性。一切善法，因善知識能發起故。三世諸佛、十二部經，在人性中本自具有，不能自悟，須求善知識示導方見。若自悟者，不假外善知識。{若取外求善知識}望得解脫，無有是處。自心內知識，自悟即是。自心若起邪迷，妄念顛倒，外善知識雖有教授，救不可得。自心若正，起般若觀照，一剎那間，妄念俱滅。若識自性，一悟即至佛地。

善知識！智慧觀照，內外明徹，識自本心。

若識本心，即本解脫。{若得解脫，}即是般若三昧，即是無念。

### 【C16】

何名無念？若見一切法，心不染著，是為無念。

用即徧一切處，亦不著一切處。但淨本心，使六識從六門走出，於六塵中無染無雜，來去自由，通同無滯，即是般若三昧，自在解脫，名無念行。

莫百物不思，當令念絕，即是法縛，{即}名邊見。

善知識！悟無念法者，萬法盡通。悟無念法者，見諸佛境界。悟無念法者，至佛位地。

### 【C17】

善知識！後代得吾法者，常見吾法身，不離汝左右。善知識！將此頓教法門，同見同行，發願受持，如事佛故，終身受持而不退者，欲入聖位，然須傳授。從上迤來默傳分付，不得匿其正法。

### 【C18】

若不同見同行，在別法中，不得傳付。損彼前人，究竟無益。恐愚不解，謗此法門，百劫千生，斷佛種性。

### 【L1】（德異本編號）

善知識！吾有一《無相頌》，汝等誦取，言下令汝迷罪消滅。頌曰：

迷人修福不修道，只言修福便是道。  
布施供養福無邊，心中三惡元來造。  
擬將修福欲滅罪，後世得福罪還在。  
但向心中除罪緣，各自性中真懺悔。  
忽悟大乘真懺悔，除邪行正即無罪。  
學道常於自性觀，即與諸佛同一例。

五祖唯傳此頓法，普願見性同一體。  
若欲當來覓法身，離諸法相心中洗。  
努力自見莫悠悠，後念忽絕一世休。  
若悟大乘得見性，虔恭合掌志心求。

師言：今於大梵寺中，說此頓教，普願法界眾生，於此言下見性成佛。

【D3】（德異本編號）

師說法了，韋使君與官僚道俗，一時作禮，無不悟者，{皆}歎：善哉！  
何期嶺南有佛出世。

## 八、示西方相狀門（武帝問功德附）【功德淨土品 4】

【E1】（德異本編號）

爾時，韋使君再肅容儀，禮拜問曰：「弟子聞和尚說法，實不可思議。  
今有少疑，欲問和尚，願大慈悲，特為解說。」

師曰：「有疑即問，何須再三。」

使君曰：「和尚所說，可不是達磨大師宗旨？」

師曰：「是。」

【E2】

使君曰：「弟子聞說達磨初{化}梁朝武帝，{帝}問：朕一生迤來，  
造寺、供僧、布施、設齋，有何功德？達磨言：實無功德。武帝悵快，  
不稱本情，遂令達磨出境。弟子未達此理，願和尚為說，達磨意旨如何？」

師言：「實無功德，勿疑先聖之言。武帝心邪，不知正法。造寺、供  
養、布施、設齋，名為求福，不可將福便為功德。{功德}在法身中，  
不在修福。」

師言：見性是功，平直是德，念念無滯，常見本性，真實妙用，名為  
功德。外行禮敬是功，內心謙下是德。自性建立萬法是功，心體離{念}  
是德。不離自性是功，應用無染是德。若覓功德法身，但依此作，是  
真功德。若修功德之人，心即不輕，常行普敬也。」

師曰：「心常輕人，吾我不斷，即自無功。自性虛妄不實，即自無德。  
無功德之人，為吾我自大，常輕一切故。」

善知識！念念無間是功，心行平直是德。自修身是功，自修性是德。  
德即不輕，常行普敬。」

韋使君默然作觀。

師言：「善知識！功德{須}自性內見，不是布施、供養之所求也。是以福德與功德別。武帝不識理，非我祖師有過。」

【E3】

使君頂禮，願為弟子，又問：「弟子常見僧俗念《阿彌陀經》，願生西方。請和尚說得生彼不？願為破{疑}。」

【E4】

師言：「使君善聽！某甲與說。世尊在舍衛城中，說西方引化，經文分明，去此不遠。若論相說，里數即有十萬八千。若說身中，十惡八邪便{是}。說遠只為下根，說近為其上智。人有兩種，法無兩般。迷悟有殊，見有遲疾。迷人念佛生彼，悟人自淨其心，所以佛言：隨其心淨，即佛土淨。」

師言：「東方人但淨心無罪，西方人心不淨有愆。東方人造罪，念佛求生西方。西方人造罪造愆，彼土念生何國？凡愚不了自性，不識身中西方，願東願西。悟人在處一般。所以佛言：隨所住處常安樂。

使君！心地但無不善，西方去此不遙；若懷不善之心，念{佛}往{生}難到。今勸善知識先除十惡，即行十萬。{後}除八邪，乃過八千。念念見性，常行平直，到如彈指，便覩彌陀。能淨能寂，即是釋迦。心起慈悲，即是觀音。常行喜捨，名為勢至。

使君！但行十善，何須更願往生？不斷十惡之心，何佛即來迎請？若悟{無}生頓法，見西方只在剎那；不悟，念佛欲往，路遙如何得達？」

師言：「某甲與諸人移西方如剎那間，目前便見，{願}不願？」

【E5】

使君頂禮言：「若此處見，何須更願往生？願和尚慈悲，便現西方，普願得見。」

師言：「徒眾用心！一時若見西方，無疑即散。」

【E6】

師言：「大眾！世人自色身是{城}，眼、耳、鼻、舌是城門，外有五門，內有意識。心為地，性是王，王居心地上。性在王在，性去王無。性在身心存，性無身心壞。

佛向性中作，莫向外求。自性迷即是眾生，離迷{即覺}，覺即是佛。慈悲即是觀音，喜捨名為勢至，能淨即釋迦，平直即彌陀。

人我是須彌，邪心是海水，煩惱是波浪，毒害是惡龍，虛妄是鬼神，塵勞是魚鼈，貪瞋是地獄，愚癡是畜生。

善知識！常行十善，天堂便至。除人我，須彌倒。無邪心，海水竭。煩惱無，波浪滅。毒害除，魚鼈絕。

自心地上，覺性如來放大光明，外照六門清淨，照破六欲諸天。內照三毒若除，地獄一時消散。內外明徹，不異西方。不作此修，如何到彼？」

大眾聞說，俱歎善哉！但是迷人，了{然}見性，悉皆禮拜，唯言：「善哉！普願法界眾生，聞者一時悟解。」

【E7】

師言：「善知識！若欲修行，在家亦得，不由在寺。在家能修，如東方人心善。在寺不修，如西方人心惡。但心清淨，即是自性西方。」

【E8】

{使君又問}：「在家如何修行？願為教授。」

【E9】

師言：「{吾}與大眾作《無相頌》，但依此修，常與吾同處無別。若不依此修行，雖在吾邊，如隔千里。」

頌曰：

說通及心通，如日處虛空，唯傳見性法，出世破邪宗。  
法即無頓漸，迷悟有遲疾，只這見性法，愚人不可悉。  
說即雖萬般，合理還歸一，煩惱暗宅中，常須生慧日。  
邪來煩惱至，正來煩惱除，邪正俱不用，清淨至無餘。  
菩提本自性，起心即是妄，淨性在妄中，但正無三障。  
世人若修道，一切盡不妨，常自見己過，與道即相當。  
色類自有道，各自不相妨，離道別覓道，覓道不見道。  
欲得見真道，行正則是道，自若無道心，闍行不見道。  
若真修道人，不見世間過，若見他人非，{自}非卻在左。  
他非我不非，我非自有過，但自却非心，{打}除煩惱破。  
欲擬化他人，自須有方便，勿令彼有疑，則是自性見。  
法元在世間，於世出世間，一切盡打却，菩提性宛然。

【F1】（德異本編號）

師言：「善知識！總須誦取，依此偈修，言下見性，雖去吾千里，如常在吾邊；於此言下不悟，即對面千里。

各各自修，法不{相}待。

眾人且散，吾歸曹溪山。  
眾若有疑，却來相問，為眾破疑，同見佛性。」

### 【F2】

時，在會道俗豁然大悟，咸讚善哉！俱明佛性。

## 九、諸宗難問門【參請機緣品 8】

○大師出世，行化四十餘年。諸宗難問，僧俗約千餘人，皆起惡心，欲相難問。

師言：一切盡除，無名{可名}，名於自性。無二之性，是名實性。於實性上，建立一切教門，言下便須自見。

諸人聞說，總皆頂禮，請事為師，願為弟子。如此之徒，說不可盡。若論宗旨，傳授《壇經》者，即有{稟}承，所付須知去處、年月、時代、姓名，遞相付囑。

若無《壇經》稟承者，即非南宗弟子，緣未得所稟，雖說頓法，未契本心，終不免諍。

但得法者，{只}勸修行。諍是勝負之心，與道相違矣。

## 十、南北二宗見性門【屬參請機緣品 8】

### 【1a】志誠

世人盡言南能北秀，未知事由。

且秀大師在荊南府當陽縣玉泉寺住。

能大師在韶州城東{四}十五里曹溪山住。

法本一宗，人有南北。何名頓漸？法即一種，見有遲疾。法無頓漸，人有利鈍，故名頓漸。

### 【1b】

秀聞師說法{徑}疾，直指見性。遂命門人志誠曰：「汝聰明多智，可與吾到曹溪山禮拜。但坐聽法，莫言吾使汝去。汝若聽得，盡心記取，却來與說。吾{看}彼所見，誰遲誰疾？火急早來，勿令吾怪。」

### 【1c】

志誠唱諾，禮拜便行。{經}二十五日至曹溪山，禮師坐聽，不言來處。志誠一聞，言下便悟，即起禮拜，白言：和尚！弟子在玉泉秀和尚處，學道九年，不得契悟。今聞和尚一說，忽然悟解，便契本心。和尚慈

悲！弟子生死事大，又{恐}輪迴，願當教示。

【1d】

師曰：汝從玉泉來，應是細作。

對曰：不是。

師曰：何得不是？

對曰：未說即是，說了不是。

師曰：煩惱菩提，亦復如此。

【1e】

師問志誠曰：吾聞汝禪師教示學人，唯傳戒定慧，未審汝師說戒定慧，行相如何？與吾說看。

志誠曰：秀和尚說，諸惡不作名為戒，諸善奉行名為慧，自淨其意名為定，此是戒定慧。彼說如此，未審和尚所見如何？願為解說。

師曰：秀和尚所見，實不可思議。吾所見戒定慧又別。

【1f】

志誠啟和尚：戒定慧只合一種，如何更別？

師曰：汝師說戒定慧，接大乘人。吾戒定慧，接最上乘人。悟解不同，見有遲疾。

汝聽吾說，與彼同不？吾所說法，不離自性；離體說{法}，自性常迷。須知一切萬法，皆從自性起用，是真戒定慧等法。

常見自性{自}心，即是自性等佛。

師曰：志誠！聽吾說：

心地無非自性戒，心地無癡自性慧，心地無亂自性定。

【1g】

師言：汝師戒定慧，勸小根人。吾戒定慧，勸大智根人。

若悟自性，亦不立菩提涅槃，亦不立解脫知見。無一法可得，方能建立萬法，是真見性。若解此意，亦名佛身，亦名菩提涅槃，亦名解脫知見，亦名十方國土，亦名恒河沙數，亦名三千大千，亦名大小藏十二部經。見性之人，立亦得，不立亦得，去來自由，無滯無礙，應用隨作，應語隨答，普見化身，不離自性，即得自在神通、游戲三昧之力，此名見性。

【1h】

志誠再啟：和尚！如何是立不立義？

師曰：自性無非、無癡、無亂，念念般若觀照，常離法相，自由自在，縱橫盡得，有何可立？自性自悟，頓悟頓修，亦無漸次，所以能立一切法，佛言寂滅，有何{漸}次？

志誠禮拜，便住曹溪，願為門人，不離左右。

### 【2a】法達

復有一僧，名曰法達。常誦《法華經》七年，心迷不悟正法，來詣曹溪，禮拜問曰：弟子誦《法華經》，心常有疑，又不知正法之處。和尚{智}慧廣大，願為決疑。

### 【2b】

師曰：法達！法即甚達，汝心不達。經上無疑，汝心自疑。汝心邪而求正法。吾心正則是持經。吾不識文字，汝取經來誦，誦之一遍，吾聞即知。

法達取經，便誦一遍。師知佛意，乃與說經。

### 【2c】

師言：法達！經無多語，七卷盡是譬喻因緣。如來廣說三乘，只為世人根鈍。經文分明，無有餘乘，唯一佛乘。

汝聽一佛乘，莫求二乘，迷却汝性。且經中何處是一佛乘？吾聞汝誦經云：諸佛世尊，唯以一大事因緣故，出現於世（正法有一十六字）。此法如何解？如何修？汝用心聽，吾為汝說。

師言：法達！人心不思，本來寂靜，離却邪見，即大事因緣。內外不迷即離兩邊。外迷著相，內迷著空。於相離相，於空離空，即是不迷。若悟此法，一念心開，出現於世。心開何事？開佛知見。佛猶覺也，分為四門：開覺知見、示覺知見、悟覺知見、入覺知見。此名開示悟入。從上一處入，即覺知見，見自本性，即得出現。

師言：吾勸一切人，於自心地，常開佛知見。

世人心邪，愚迷造罪，口善心惡，貪瞋、嫉妬、讒佞、侵害，自開眾生知見。

世人心正，常起智慧觀照，自心{止惡}行善，自開佛知見。汝須念念開佛知見，莫開眾生知見，開佛知見即見出世。

師言：法達！此是《法華經》一乘義，向下{分之為三乘者，蓋}為迷人，故汝但依一佛乘。

### 【2d】

師言：法達！心行轉《法華》，不行《法華》轉。心正轉《法華》，心

邪《法華》轉。開佛知見轉《法華》。

努力依法修行，即是轉經。自心若不念念修行，即常被經轉。

【2e】

法達一聞，言下大悟，涕淚悲泣，白大師言：實未曾轉《法華》，七年被《法華》轉。念念願修{佛行}。

師言：行佛行，是佛。

其在會者，{各}得見性。

【3a】智常

復有僧，名曰智常。

【3b】

禮拜問四乘義，啟和尚：

佛說三乘法，又言最上乘。弟子不解，願為教授。

【3c】

師曰：汝向自心見，莫著外法相，法無四乘，人心自有四等。

見聞轉讀是小乘，悟法解義是中乘，依法修行是大乘。萬法盡通，萬行俱備，一切不染，離諸法相，作無所得，名最上乘。

{乘是行義}，不在口誦，汝須自修，莫問吾也。

一切時中，自性自知，是四乘義。

【4a】神會

又玉泉寺有一童子，年十三歲，南陽縣人，名曰神會。

【4b】

禮師三拜，問曰：和尚坐禪，還見不見？

師以柱杖打三下，却問：吾打汝，還痛不痛？

對云：亦痛亦不痛。

師曰：吾亦見亦不見。

神會問：如何是亦見亦不見？

師曰：吾之所見，常見自心過愆，不見他人是非好惡，所以亦見亦不見。汝言亦痛亦不痛如何？汝若不痛，同其木石；若痛，即同凡夫，{應生瞋}恨。

師言：神會小兒向前，見不見是二邊；痛不痛屬生滅。汝自性且不見，敢來弄人！

神會禮拜{悔}謝，更不敢言。

【4c】

師曰：汝心迷不見，問善知識覓路。汝心悟即自見性，依法修行。

汝 { 迷 } 不見自心，却來問吾見與不見？

{ 吾見 } 自知，代汝迷不得。汝若自見，不代吾迷。

何不自知見，{ 乃 } 問吾見不見？

【4d】

神會禮經百拜，求謝愆過，請事為師，不離左右。

【唐朝徵詔品 9 (無)】

十一 { 甲 }、教示十僧傳法門【法門對示品 10】

【1a】

爾時，師喚門人法海、志誠、法達、神會、{ 智 } 常、智通、志徹、志道、法珍、法如等，報言：吾滅度後，凡為人師，改易者多。汝等十人向前，{ 汝 } 等不同餘人，吾滅度後，各為一方師。

【1b】

吾今教汝諸法，不失本宗。先須舉三科法門，動用三十六對，出沒即離兩邊，說一切法，莫離自性。

忽有人問，出語盡雙，皆取對{ 法 }。來去相因，究竟二法盡除，更無去處。

【1c】

三科者，陰、界、入。

五陰者，色、受、想、行、識。

十二入者，外六塵，內六門。

六塵者：色、聲、香、味、觸、法。

六門者，眼、耳、鼻、舌、身、意，各有一識。

十八界者，六塵、六門、六識為之十八。

自性含萬法，名含藏識。若起思量，即是轉識。轉識生六識，出六門，見六塵，三六十八。

由自性用。

自性邪，起十八邪。{ 自性 } 正，起十八正。

{ 惡用 } 即眾生；善用即是佛。

用由何等？由自性對。

解用即通一切法，自身是佛。

### 【1d】

外境無情五對：

天地對，陰陽對，日月對，明暗對，水火對。

法相語言十二對：

語法對，有為無為對，有色無色對，有漏無漏對，色空對，動靜對，清濁對，有相無相對，凡聖對，僧俗對，老{少}對，大小對。

自性起用十九對：

長短對，邪正對，亂定對，戒非對，直曲對，癡慧對，愚智對，慈毒對，實虛對，險平對，煩惱菩提對，悲苦對，瞋喜對，捨慳對，進退對，生滅對，常無常對，法身色身對，化身報身對。

都三十六對。

### 【1e】

師言：此是三十六對法，若解用即通貫一切經，出入即離兩邊。

自性動用，共人言語，外於相離相，內於空離空。若執全空，唯長無明。

又却謗經，言『不用文字』。

師曰：說法之人，口云不用文字。世人道者，盡不合言。正語之時，即是文字。文字上說空，本性不空，即是文字。

文字無邪正，{卻直}道：『不立文字』。

只這不立兩字，即是文字。見人所說，便即謗他言著文字。

汝等須知，自迷猶可，又謗佛經。不要謗經，罪障無數。著相於外而求真，{或}廣立道場，說有無之過患。如是之人，累劫不可見性。{但}勸依法修行。莫百物不思，於道自生質礙。若聽說不修，令人{反}生邪念，但能依法修行，常行無相法施。

師言：汝等{若}悟，依此說，依此用，依此行，依此作，即不失本宗。若有人問汝義，問有將無答，問無將有答，問凡以聖對，問聖以凡對，問一邊將二邊對，二法相因，生中道義。教汝一問，餘問一依此作，三十六對法，即不失理也。

吾今教汝一答。

人問：何名為暗？

答云：明是因暗，即緣暗有明，明沒即暗。但無明暗，以明顯暗，以暗現明，來去相因，成中道義。餘問{悉}皆如此。

### 【1f】

師教十僧已，報言：於後傳法，遞相教授《壇經》，即不失宗旨。

汝今得了，遞代流行。  
後人得遇《壇經》，如親見吾。  
教示十僧：汝等抄取，代代流行。  
若{看}《壇經》，必當見性。

## 十一 {乙}、滅度年月附【付囑流通品 11】

### 【2a】

大師先天元年，於新州國恩寺造塔，至二年七月八日，喚門人{告}別。

師言：「汝等近前，吾至八月欲離世間。  
汝等有疑，早須相問，為{汝}破疑，當令迷盡，使汝{安}樂。  
吾若去後，無人教汝。」  
{法}海等聞，悉皆涕泣。唯有神會，不動神情，亦無涕泣。

### 【2b】

師曰：「神會小師却善不善等，毀譽不動。  
餘者空得數年在山，修行何道？汝今悲泣，為憂阿誰？  
若憂不知去處，吾自知去{處}。吾若不知去處，終不別汝等。  
汝等悲泣，為不知吾去處。知吾去處，不{合}悲泣。  
法性體無生滅去來。  
汝等{盡}坐，吾與汝等一偈，名曰《真假動靜》。  
汝等誦取此偈，與吾意同，依此修行，不失宗旨。」  
眾僧作禮，請師說偈。

### 【2c】

{偈曰：}

一切無有真，不以見於真，若見於真者，是見盡非真。  
若能自有真，離假即非真，自心不離假，無真何處真。  
有情即解動，無情即不動，若修不動行，同無情不動。  
若覓真不動，動上有不動，不動是不動，無情無佛種。  
能善分別相，第一義不動，但作如是見，即是真如用。  
報諸學道人，努力自用意，莫於大乘門，卻執生死智。  
若言下相應，即共論佛義，若實不相應，合掌令歡喜。  
此宗本無諍，諍即失道意，執迷諍法門，自性入生死。

時，眾僧聞知大師意，更不敢諍。  
各自攝心，依法修行，一時禮拜，即知大師不久住世。

【3a】

法海上座問曰：和尚去後，衣法當付何人？

師言：吾於大梵寺說法，直至今日，抄錄流行，名《法寶記》，汝等守護，度諸群生，但依此說，是真正法。

師言：法海向前！吾滅度後，二十年間，邪法繚亂，惑我正宗。有一南陽縣人出來，不惜身命，定於佛法，豎立宗旨，即是吾法弘於河洛，此教大行。

【3b】

師言：汝今須知，衣不合傳。

汝若不信，吾與汝說先聖達磨大師傳衣偈，據此偈意，衣不合傳。  
汝聽！偈曰：

吾本來東土，說法救迷情，一花開五葉，結果自然成。

師曰：吾有一偈，用先聖大師偈意：

心地含種性，法雨即花生，頓悟花情已，菩提果自成。

師說偈已，令門人散。

眾相謂曰：「大師多不久住世間。」

【4a】

師至先天二年八月三日，食後報言：「汝等各著位坐，今共汝別。」

【4b】

時法海問言：「此法從上至今傳幾代？願和尚說。」

【4c】

師曰：初六佛、釋迦第七、迦葉、阿難、末田地、商那和修、優波掬多、提多迦、佛陁難提、伏馱蜜多、脇尊者、富那夜奢、馬鳴、毗羅尊者、龍樹、迦那提多、羅睺羅多、僧伽那多、僧伽耶舍、鳩摩羅馱、闍那多、波修槃頭、摩拏羅、鶴勒那、師子比丘、舍那婆斯、優波掘多、婆須蜜多、僧伽羅叉、菩提達磨、北齊慧可、唐僧璨、唐道信、唐弘忍、吾今惠能。

師曰：吾今付法於汝，汝等於後遞相傳授，須有稟承依約，莫失宗旨。

【4d】

法海白言：「和尚留何教法，令後代迷人，得見自性？」

【4e】

師言：汝聽！後代迷人，若識眾生，即見{佛}性，若不識眾生，萬劫覓佛難逢。吾今教汝識自心眾生，見自心佛性。汝志心聽！吾與汝說。後代之人，欲求見佛，但識眾生。

師曰：只為眾生迷佛，非是佛迷眾生。

自性若悟，眾生是佛。自性若迷，佛是眾生。

自性平直，眾生是佛。自性邪險，佛是眾生。

師言：法海！汝等心若險曲，即佛在眾生中。

一念平直用心，即是眾生成佛。

我心自有佛，{自佛是真佛}，自若無佛心，何處求真佛？

【4f】

吾今留一偈，與汝等別，名《自性真佛偈》。

後代迷人，識此偈意，自正本心，自成佛道。

偈曰：

真如性淨是真佛，邪見三毒是魔王，

邪迷之時魔在舍，正見之時佛在堂。

性中邪見三毒生，即是魔王來住舍，

正見自除三毒心，魔變成佛真無假。

法身報身及化身，三身本來是一身，

若向性中能自見，即是成佛菩提因。

{本從}化身生淨性，{淨}性常在化身中，

性使化身行正道，當來性智更無窮。

婬性本是淨性因，除婬即無淨性身，

性中各自離五欲，見性剎那即是真。

今生若悟頓法門，忽見自性現世尊，

汝等修行覓作佛，自性自見正中真。

若能心中自見真，有真即是成佛因，

不見自性外覓佛，起心總是大癡人。

頓教法門今已留，救度世人須自修，

報汝當來學道者，不作此見大悠悠。

【4g】

師說偈了，報言：今共汝別，吾滅度後，莫作世情，悲泣兩淚，受人弔問。身著孝服，非吾弟子，亦非正法。

但如吾在日，一時盡坐，無動無靜，無生無滅，無去無來，無是無非，無住無往，無名無字。恐汝心迷，不會吾意，吾今再囑，令汝見性。吾滅度後，依此修行，如吾在日。汝等違法，縱吾在世，終無有益。大師言訖，夜至三更，奄然遷化。

大師春秋七十有六。

師遷化日，寺內異香氛氳，經于七日，感得山崩地動，草木變白，日月無光，天地失色，群鹿鳴叫，至夜不絕。

先天二年八月三日，夜三更時，於新州國恩寺圓寂。

餘在〈功德塔記〉具述。

【5a】

至十一月，韶廣二州門人，迎師神座，向曹溪山葬。忽於龕內白光出現，直上衝天，三日始散。韶州奏聞，奉敕立碑供養。

【5b】

洎乎法海上座無常，以此《壇經》付囑志道，志道付彼岸，彼岸付悟真，悟真付圓會。遞代相傳付囑。

【5c】

一切萬法，不離自性中見也。

**六祖壇經卷下**

## 〈真福寺本〉的序跋

封面：六祖壇經

韶州曹溪山六祖壇經序：依真小師邕州羅秀山慧進禪院沙門惠昕述。

後敘：周希古述，大中祥符五年歲次壬子十月八日。

### (1) 〈韶州曹溪山六祖壇經序〉

依真小師邕州羅秀山慧進禪院沙門惠昕述

原夫真如佛性，本在人心。心正即諸境難侵，心邪即衆塵易染。能止心念，衆惡自亡。衆惡既亡，諸善皆備，非假外求。

悟法之人，自心如日，遍照世間，一切無礙。

見性之人，雖處人倫，其心自在，無所惑亂矣。

故我六祖大師廣為學徒，直說見性法門，總令自悟成佛，目曰《壇經》，流傳後學。古本文繁，披覽之徒，初忻後厭。

余以太歲丁卯，月在蕤賓，二十三日辛亥，於思迎塔院，分為兩卷，開十一門，貴接後來同見佛性者也。

#### 【解析】

1. 此經全名：《韶州曹溪山六祖壇經》，簡稱為《六祖壇經》、《壇經》。
2. 「古本文繁，披覽之徒，初忻後厭」：此處古本就是惠昕手頭的壇經，約一萬三千字，對一般人而言，文字算多，稱之為「文繁」，由於沒有分卷分門，因而開始讀時還覺有趣，接著文繁而不易讀下去，所以「初忻後厭」。
3. 「余…分為兩卷，開十一門，貴接後來同見佛性者」：惠昕分卷分門，使後人容易閱讀，稱之為「貴接後來同見佛性者」。
4. 「太歲丁卯」：惠昕於唐貞元三年(787)分卷分門。
5. 由其他史料推知惠昕寫序年代：
  - a. 南宋《輿地紀勝》卷之一百六《邕州·仙釋》：「正恩大師。羅秀山在宣化縣北，天寶三載（西元744年）正恩大師惠昕于此開山。」
  - b. 宋代趙明誠、李清照所撰《金石錄》卷六：「第一千六百五十五。唐惠昕大師碑。齊推撰。正書。姓名殘缺。貞元十七年(801)十一月。」

c. 故推知「太歲丁卯，月在蕤賓，二十三日辛亥」中的丁卯是唐德宗貞元三年（787年）。

## (2) 周希古後敘

余嘗公暇，信覽曹溪六祖大師《壇經》，導化迷愚之人，令識本心、見本性，自悟成佛，莫向外求。言直理玄，法法非法，不可思議，乃勸諸善，諦印經、受持，獲大功德、無上菩提者也。

大中祥符五年（1012年）歲次壬子十月八日傳教弟子宣德郎守尚書屯田員外郎騎都尉賜緋魚袋周希古叙。

網路資料：真福寺本（1012）

<http://www.ss.ncu.edu.tw/~calin/altar/a-bl.pdf>

---

## 關於編校者

林崇安教授，台灣台中縣人，1947年生。美國萊斯大學理學博士（1974）。中央大學專任教授（1974-2000），曾於法光、圓光、中華佛研所兼授佛學課程。內觀教育禪林創辦人。  
佛學專長：內觀禪修、佛教邏輯、佛教宗派思想。

### ◎歷年佛學與禪修編著以 PDF 檔和影音頻道分享：

#### （1）林崇安教授文集 <http://www.ss.ncu.edu.tw/~calin/>

本網頁收集【佛法教材】有 120 冊，【佛法論文集】有 260 篇，【六祖壇經專集】有壇經原典和論文 50 篇。【科學哲學】有 23 篇文章。  
【內觀雜誌】共 120 期電子檔。

#### （2）林崇安教授 YouTube 影音頻道

1. 「佛法教材研習」共 63 檔，解說《雜阿含經論會編》的要義。
2. 「內觀教材研習」共 138 檔，解說佛教心理、內觀經文、禪修問答、佛教邏輯總綱、佛教史總綱、佛法複習等等。

### ◎內觀教育基金會網站和臉書

基金會網站 <http://www.insights.org.tw/>

臉書：搜尋「內觀教育禪林」、「林崇安」。

佛法教材系列 W5

書名：《六祖壇經真福寺本》

編校：林崇安教授

出版：桃園市內觀教育基金會

網址：<http://www.insights.org.tw>

倡印：內觀教育禪林

通訊：桃園市大溪區頭寮路 355 號之 5（內觀教育禪林）

出版日期：2021 年 3 月

歡迎倡印，免費結緣